

玄門報孝追薦儀

壹十三

玄門報孝追薦儀

壹十三

自然朝行道

師堂序立

少虛

啓師

恭以金真演教弘敷拔度之文玉冊垂科茂
著昇遷之法存亡是賴幽顯均沾由是東極
垂救苦之慈北魁置拔亡之局可使亡魂受
度能令枯骨更生輒冒宗嚴俯垂鑑證恭惟
玄中教主諸大宗師幕下道貫三才心涵萬

象隨方設教應物流形爲生死之津梁作幽
冥之主宰切念臣某浮黎小兆靈寶微生叨
承無量之真梯獲拜玄中之師範拯幽拔滯
濟物利人臣今謹爲入意尚慮亡魂無邊苦
爽自因宿世以至今生萬罪千愆陽非陰過

壹十三

罪旣違於青律名必記於黑書囚閉寒庭拘
留幽獄若不皈投於玉陛焉能召到於皇壇
徑仰叩於天威乞俯憐於幽滯拜貢素悃上
瀆青玄請降恩光開明黑暗伏願真慈汲引
聖德矜容告符命於河源變劔樹而作瓊樹

頌赤書於狴犴化刀山而爲寶山願垂照燭
之慧光茂蕝慈悲之誓願煥明長夜輝映幽
途庶俾亡魂均承道果脫重泉之報對登仙
境以逍遙仰賜玄恩早垂昭報但臣下情不
勝虔禱之至領衆陞壇恭行典式

唱道

陞壇

燒香頌

各禮師存念如法

玄陰七靈 九炁合形 魂精魄爽 二景回輪

飛光赫奕 煥耀長春 日月吐輝 回合華英
大梵流布 奔飛火鈴 魔王受事 朝謁帝京
含靈溥濟 廣惠幽冥 玉文敷告 萬炁昇騰
和與道合真

鳴法鼓二十四通

壹十三

二

無上三天玄元始三炁太上道君召出臣等
身中三五功曹左右官使者侍香金童傳言
玉女五帝直符直日香官各三十六人出出
者嚴裝關啓靈壇土地里域真官等神臣今
正爾陞壇燒香行道謹奏爲入意其諸情悃

已錄上聞願得

玉清道炁靈寶妙光流入臣等身中令臣所
啓之誠速達徑御

太上無極大道

東極青玄慈父太一救苦天尊御前

請稱法位

具位臣某與弟子

某謹同誠上啓

太上無極大道虛無自然元始天尊太上道
君靈寶天尊太上老君道德天尊高上玉皇
上帝句陳上宮天皇大帝中天紫微北極大

帝東極青華大帝后土皇地祇十方已得道
大聖衆至真諸君丈人東華南極西靈北真
玄都玉京紫微上宮明皇道君上相上宰上
保上傳三十六部尊經玄中大法師五帝三
官四司九府九天天曹列位真宰地府水司

五嶽四瀆名山洞府神仙聖衆三界官屬一
切威靈咸望洪慈俯垂洞鑑臣聞古之聖人
蓋與天地合其德四時合其序大哉孝行至
於日月爲之明王道爲之成蘭公得其說於
斗真謚母傳其書於太史是故淨明之法本

忠君孝親以存心盟真之齋以報祖薦親而
立教以此見學仙之士曷嘗不篤意於親謂
滅其天常是特儒者自私之論若質諸道典
豈知天真大孝之心伏念臣某猥以凡材叨
叅玄學奉經科而開化佩戒律以焚修離形
去智同大通雖有取顏淵之語慎終追遠則
歸厚常思廣曾子之言屬同門志切於薦親
爲祭酒義當於領奏陟降在左右幸瞻帝真
穆穆之光孝悌通神明諒鑑人子區區之請
既承詞旨敢不上聞

宣詞

按如詞言備殫懇款仰祈大道俯鑑小心臣
聞民生於三事之如一道出於一教分於三
故資事父以事君則忠孝之義盡取於治身
而治國則清淨之化成其在棲真者流尤以

報君爲重是以九真妙戒以敬勤爲入德之
門三錄本科以焚修爲祝釐之意教所由來
遠矣學者所宜則之以今陞壇行道請法衆
等運茲初捻上香

願此香煙騰空徑上供養

無上至真道寶臣等首體投地皈命
太上三尊十方衆聖以是功德上祝

皇帝聖壽萬安伏願

道叅玄聖德配皇天眷命有德者昌宗社衍
萬年之慶無爲而民自化華夷歸一統之中

壹十三

四

今故燒香自皈依

道尊大聖衆至真之德得道之後和保天長
存

臣聞人本乎祖孝始於親自禮經而言除七
廟二祧餘不在丞嘗之列以道書而論則億

曾萬祖猶應在薦拔之科蓋有先亡未受度而不得仙亦有前世不祀祖而猶爲罪是故女青禁典中存拔贖之文靈寶本章首列追度之品凡道士修真此爲先務故

天尊設教具有明文以今陞壇行道請法衆等運茲二捻上香

願此香煙騰空徑上供養

無上至真經寶臣等首體投地仰依

太上三尊十方衆聖願以是功德歸流報孝弟子某道俗二門玄祖上世先靈俾沐善功

俱超仙界伏願

三境下雞竿之詔九幽承龍簡之恩緣本思
舊宗早拔籍於泉曲之府混化歸元一即遷
神於朱火之宮今故燒香自皈依
經尊大聖衆至真之德得道之後和昇入無

形

臣聞廣大精微君子之道可傳也劬勞鞠育
父母之恩莫重焉凡有血氣者且知用其情
豈思道德者而可忘其本蓋有生未伸於榮
養死尤切於追資王尊師依玉皇本行以薦

親卒如其志莫氏子誦青霄隱書而拔母果
獲其成仰前哲之耿光宜後人之明鑑以今
陞壇行道請法衆等運茲三捻上香
願此香煙騰空徑上供養

無上至真師寶臣等首體投地仰依

太上三尊十方衆聖願以是功德徑爲弟子
某拔度所薦亡者某神魂出離冥途上昇仙
境伏願乘三化五鍊之功出九夜重陰之苦
服飛根而生玉液早遊神大渺之堂咀靈芝
而漱金泉即飛步洞陽之館今故燒香自皈

依
師尊大聖衆至真之德得道之後和昇入無
形

禮方

各長跪懺悔

臣等伏聞太史昇仙傳九幽明真之典天師
得道留三八謝罪之科非紙徒薦拔於先亡
特所以發明於孝道伏念亡者其浮生若夢
大患有身六塵徧染三業繁纏滋生罪垢五
蘊非真四大假合動涉塵緣顛連於是非物

我之途流轉於情慾愛憎之地心生口語日
積月深衡鑑無私固莫逃於考覈幽明異致
亦難憶其升沉以今報孝弟子某幼師道德
之風未報劬勞之德倘先靈之未度將此念
以何安庸奉玄科以資冥福謹齋香花燈燭

壹十三

六

法信供養之儀皈命

太上無極大道十方靈寶天尊十方救苦天
尊十鄉神仙諸靈官伏願天恩昭曠宇量含
洪念先親汨沒於世緣未能自拔凡平生註
誤於憲網咸與維新俛脫籍於幽關早化形

於丹界然願存亡兩世俱逢天開地闢之時
道俗二門均囿日照月臨之下懺謝之後昇
入無形

命魔

步虛

三啓頌

三禮

重稱法位

具位臣某等重誠上啓

三清四梵八極九霄紫闕黃房雲宮星府至

真至大無極無窮三界高真玄壇衆聖咸望
洪慈俯垂洞鑑伏念臣等樗櫟散材醯雞小
見栖遲玄宇雖知讀黃老之書傳習齋科豈
盡得陸張之意但以盟心於利濟輒忘越分
以行持惟三綱五常乃立人之大本而九幽
十類皆失道之窮魂爰謹薦揚庶期開度以
今奉爲其懺悔亡故某及祖宗父母九幽長
夜一切苦魂雖廁處於人倫自汨沉於天理
惟五教之有親有義有別有序有信雖曰有
常犯六刑之不孝不弟不睦不嫺不任至於

不恤居上無道爲下不忠禮義廉恥之俗微
放僻邪侈之習勝迷迷不覺一旦花殘銀海
而氣斷玉樓戀戀相牽萬劫足履刀山而手
攀劒樹以今弟子其求啓紫微之祕特修玉
匱之科驛簡通幽龍童效信仰惟大造特霽
殊恩神光所燭而無隱不通惠澤所加而何
冤不釋拔出地戶不爲地獄之沈囚朝禮天
顏俱到天尊之法會然願乾坤交泰日月貞
明海宇承平俱在八荒之壽域天人受度獲
登無上之至真至於神虎官君龍符驛吏承

流宣化俱有開通冥道之勞崇德報功宜在
遷轉仙階之列上祈

天尊大慈之化下副臣等皈告之誠謹啓以

聞

發願

一願元始符命

二願幽夜開光

三願金籙度命

四願黑簿除愆

五願苦海息浪

六願火獄沈煙

七願怡神快樂

八願解釋冤牽

九願聞經悟道

十願進品仙階

十一願 豐都罷對

十二願 學道成仙

存神燒香

香官使者左右龍虎君侍香諸靈官當令臣
行道朝修之所自然生金液丹碧芝英百靈
衆真交會在此香火爐前當願亡魂受度第

壹十三

八

子蒙恩十方仙童玉女接待蘭煙傳臣向來
所啓之誠速達徑詣

太上無極大道

東極青玄慈父太一救苦天尊御前

出堂頌

下壇

謝師

天門九重開式展朝元之禮地獄五苦解均
承度命之功謹扣謁於師垣特恭伸於謝悃
臣某適來謹爲報孝弟子某恭依教典宣闡
朝儀慮有犯於繩規恐難逃於斧鉞仰祈慈
造俯賜矜容伏願金符度命而九地皆春丹
簡宣恩而諸囚罷對亡爽悉超於道岸永證
逍遙玄門茂振於宗風均沾化育臣干冒崇
嚴下情不勝恭謝之至

回向

設醮謝恩

步虛

灑淨

宣衛靈呪

請稱法位

壹十三

具位臣某等同誠上啓

列聖咸望洪慈洞回昭鑑臣聞道者羣心
之用物莫能違孝為百行之先人當自勉惟
父母之功莫大與乾坤之造同符是故謹母

藏教於黃堂先明孝道玄帝傳經於玉篋具
述報恩豈徒養生喪死之盡情亦欲積行修
緣而入妙蘇仙留橘井與慈母以立功真武
宴谷巖爲二親而修果以此見人倫之大最
爲學道者之先伏念今時報孝弟子某寄跡
法中違離膝下奉甘食美服以養其口體旣
不能盡世俗之孝心求竒方妙藥以延其壽
年又安得如太平之經訓念捐世之太早莫
殺身以相從履霜露以興懷望松楸而掩淚
歲月逝矣不知魂魄以何依夢寐見之宛若

音容而相接爰修道果少福冥途然燈燒香
按玉匱盟真之典陶魂鑄魄行紫樞飛梵之
科幸法事之告成諒靈光之響答伏願皇皇
大道赫赫高真俯憐至隱之情特廣好生之
德九龍傳驛風雷渙汗於幽都萬犴停刑雨
露昭蘇於罪爽俾魂神之超度獲時刻之昇
遷九祖生天庶不負出家之意一心慕道敢
忘加修己之功臣等下情不勝凝俟之至

請班

降聖

宣詞

臣聞天雖高而聽甚卑惟誠能動子欲養而親不待從古皆然故曾參有三釜之悲而文正懷一衾之恨以賢者尚篤此事豈方外獨無是心未能盡養於生前必抱遺哀於身後

壹十三

十

幸天尊垂玉匱拔亡之典使人子伸昊天罔極之情比之廬墓以終身執喪過禮效乎刻木以爲象事亡如存論孝忱則有之皆無益於死者豈若綠章封事陳哀悃於帝前白簡飛符拔死魂於地下既鬼有所歸矣於人獨

無校乎乃知道教之垂科能濟禮經之不及
伏念報孝弟子某自憐薄命少遭閔凶鞠育
劬勞其何能報焄蒿悽愴徒切于懷爰修鍊
度之科少益幽冥之福荷真旂之委鑑設清
醮以謝恩伏願帝度其心天從所欲念先親
積德而未食其報憫微臣思孝而莫致其情
特頒渙汗之恩一洗沈冥之苦庶令逝魄早
脫幽關玉眸鍊質黃華蕩形即化形於丹界
緣字返生金房度命獲飛步於上清蛻質登
真轉輪得道臣等致恭上香謹陳亞獻

宣進狀

臣聞乾元坤元乃人元之資始父相母相即
我相之肇基生生不窮念念相續艱難苦惱
緣茲而后有長育顧復何思之能酌至人達
道本原大意識真父母滅貪嗔除險峻所以

十一

十一

報恩空結習割愛情自然去累使有相歸於
無相號真空而實不空是爲入解脫門可以
到逍遙境伏念亡故某羈縻世網汨沒妄緣
慾海愛河易縱無明之性電光石火難留觀
化之身命奄泉扃名登鬼錄顧九結十纏之

未淨在三途五苦以何逃念當年遣予以出家固其心之有托在今日濟幽而拔苦諒我道之垂憐伏願特推錫類之恩丕廣度人之德勅陶公仙伯以校籍命韓君司馬以度魂庶令亡者其受事朱宮書名黃錄一百八十煩惱業障俱消八萬四千塵勞妄緣都盡永辭苦趣頓入仙宗從茲出入於六虛不復輪迴於三界然願弟子其賞延先世師資宗祖以同昇裕及後昆道俗眷緣而迪吉學仙有遇進道無魔正妙通妙顯言有修誓不負報

恩之訓始相我相悉歸無着願早登真一之
門臣等致恭上香酒陳終獻

宣疏

送神

臣聞道非可象散則成炁聚則成形神本無
方聽之不聞視之不見惟精神之默感則陟
降之如存適舉朝儀今當拜送伏想

三清上聖遊神寥廓之鄉九地冥官復職幽
陰之境倏忽不知其所在彷徨恨莫以相從
臣某等骨肉行尸塵泥賤品叨逢道化備在

真階或俯仰之失儀或步趨之失節存奏昧
飛神之法書符違按筆之規仰祈棄過以錄
功庶免因齋而獲罪德何以報當益勵於焚
修威不違顏願常蒙於賜對臣等下情不勝
攀戀之至瞻望霄衢一心拜送

壹十三

十二

回駟頌

送出化財

玄門報孝追薦儀



